

## Letsatsi la Lefatshe la ho Balla Hodimo le Na'ibali



Dipale di na le matla! *Motsotso wa ho qetela*, e ngotswe ke mongodi ya hapileng dikgau, Zukiswa Wanner, mme ya tshwantshwa ke motaki wa dikhathuni ya tsebahalang Afrika Borwa, Rico. E balle bana bao o phelang le bona ka Letsatsi la Lefatshe la ho Balla Hodimo, 1 Hlakola 2018.



### Diketsahalo tse 5 tsa Letsatsi la Lefatshe la ho Balla Hodimo

1. Bala pale ena, *Motsotso wa ho qetela*, leqephe la 2 le la 3 o balle bana ba hao le ba bang. Ikwetlise ho e balla hodimo makgetlo a mmalwa pele o e balla bana mme o hopole ho kenya dipontsho tsa maikutlo lentsweng la hao ha o ntse o bala.
2. Pele o bala pale ena, botsa bana hore ebe ba kile ba bapala bolo ya maoto na, ba kile ba ya shebella papadi ya bolo ya maoto mabaleng kapa ba e shabella ho TV na. Ba kgothaletse ho o phetela ka boiphihlelo ba bona.
3. Kamora hoba o badile pale, kgothaletsa bana ba hao ho e hlalosa ka ho taka kapa ho penta setshwantsho sa karolo eo ba e ratileng ho feta.
4. Hlophisa kopano ya Hoseng-ha-Kopana-le-Pale ka Letsatsi la Lefatshe la ho Balla Hodimo kapa mafelong a beke. Mema bana hore ba tle le batswadi ba bona. Ba tsebise dibuka tsohle tseo o di tsebang hore di na le dipale tse monate bakeng sa ho ballwa hodimo ka ho ba balla dibuka tseo.
5. Iketsetseng diphoustara tsa Letsatsi la Lefatshe la ho Balla Hodimo 2018 bakeng sa ho bontsha batho bohlokwa ba letsatsi lena. Mmoho le bana, sehlang le ntshe di tlhaku le ditshwantsho dimakasine le dikoranteng, takang ditshwantsho, ngolang mantswe le dipolelo tsa lona, mme le sebedise ditshwantsho tse ho websaete ya Na'ibali (eyang ho "Story supplies" ho [www.nalibali.org](http://www.nalibali.org)). Iketsetseng lepetjo la lona kapa sebedisang la rona – Abelana ka pale kajeno!



### Melemo e 8 ya ho balla hodimo

Ho balla hodimo bakeng sa bana ba hao:

- o ba bontsha hore o hlomphe le ho nkela dibuka le ho bala hodimo.
- ho le nea dintho tseo le ka buisanang ka tsona.
- ho aha kutlwano pakeng tsa lona.
- ho ba dumella ho iphumanela hore ho bala ke ketsahalo e kgotsofatsang.
- ho ba kgothaletsa ho ithuta ho ipalla ka bobona, le ho dula ba bala.
- ho ba bontsha kamoo re balang ka teng le kamoo dibuka di sebetsang ka teng.
- ho etsa hore ba natefelwe ke dipale tse ka nqane ho bokgoni ba bona ba jwale ba ho bala.
- ho aha tlhontswa ya bona le bokgoni ba bona ba puo.



### O ka kenela jwang

Eya ho [www.nalibali.org](http://www.nalibali.org) kapa [www.nalibali.mobi](http://www.nalibali.mobi) ho ya ngodisa lelapa la hao, tlelapo ya hao ya ho bala kapa sekolo sa hao mme o thuse ho etsa hore ketsahalo ena e be e kgolo ka ho fetisisa ya Letsatsi la Lefatshe la ho Balla Hodimo mona Afrika Borwa!

# Motsotso wa ho qetela

Pale ka Zukiswa Wanner

Ditshwantsho ka Rico

Phetolelo ka Hilda Mohale

"Kajeno ke ilo hlaba dintlha tse pedi, Ntate," ha rialo Neo a ntse a rwala dieta tsa hae tsa bolo ya maoto.

"Mme nna ke tla thusa ka ho eketsa ka dintlha tse tharo, Malome," ha rialo Priya ya neng a qeta ho fihla habo Neo le moenanyana wa hae, Rahul. Rahul o ne a tshwere vuvuzela ya hae e mmala o bofubedu bo kganyang.


Ntata Neo a tsheha. "Tjhe, ke se ke tatetse ho ya le thoholetsa makgetlo a mahlano he!"

"Le nna, Malome! Na le nna nka ya ba thoholetsa?" ha botsa Rahul.

"Ehlile, moshanyana ka," ha rialo ntata Neo a ntse a thusa Mbali ho rwala dieta tsa hae. "Jwale, ha re tsamayeng!"

Ba kena ka koloing kaofela. Neo a dula ka pele. O ne a se a kile a dula moo ka makgetlo a mangata. O ne a ena le bonnete ba hore haeba ntatae a ne a ka mo dumella, hang ha menoto ya hae e se e le melelele hantle, o tla kgona ho kganna koloi. Ho ne ho shebahala ho le bonolo. Rahul le Priya ba dula kamorao mhlakoreng a mabedi a Mbali. Ba ne ba mo tsikinyetsa mme yena a tsheha.


Kamora nako e seng kae feela, ke ha ba se ba le mabaleng a bolo ya maoto. Ba ne ba fihlile hantle ka nako hore Priya le Neo ba ilo ema le bomphato ba bona ba tswang sehlopheng sa Maqhawe Football Club bakeng sa ho iphuthumetsa ka boikwetliso. Ba ne ba bapala kgahlanong le Diamond Football Club kajeno.



"Hopola ho netefatsa hore o thethefatsa ho benya ha Diamond hore kamora papadi ba tlamehe ho fetola lebitso la bona ho ba Coal Football Club," ha rialo mokwetlisi.

Jwale e ne e se e le nako ya hore dibapadi di mathele ka lebaleng. Moletsaphala a letsa phala ya hae mme papadi ya qala.

Dintho di ile tsa qala ka lenama, empa ka nako e seng kae ba phahamisa dieta. Ho ne ho tletse lerata ha ba malapa a bana ba dihlopha tse pedi ba ba thoholetsa. Bolo e ne e le ka lehlakoreng le leng la lebala hanyane, mme e re ha ba shebahala jwaloka haeka ba tla e lebisela lehlakoreng le leng hape, e mong wa dibapadi tsa bona o ne a hlotha bolo eo! Papadi e ile ya tswela pele ka tsela ena ho fihlela nakong ya kgefutso.



"Ke tenehile! Le ne le tshepitsa hore le tla hlaba dintlha," Rahul a bolella Neo le Priya ha ba tlike lehlakoreng.

"Ee. Mbali o batla ntlha, Mbali o batla ntlha," ha pheta Mbali. "Mbali o a otsela," a eketsa ka ho idimola. Neo le Priya ba tsheha feela mme ba kgutlela ho ditho tsa sehlopha sa bona.



Abelana ka pale kajeno!

Phala ya Ila mme dibapadi tsa mathela ka lebaleng bakeng sa halofo ya bobedi. Papadi ya tswela pele ka yona tsela eo halofo ya pele e bapetseng ka yona ... ho fihlela ho setse motsotso o le mong feela!

Neo o ne a tshwere bolo. A sheba kwana le kwana ho bona hore ebe ho na le wa Diamond Football Club ya haufi le yena. Tjhe, o ne a le mong. A mathela pele a tswapetsa bolo. Hanghang sebakadi sa Diamond Football Club sa hlahella. Neo a mo sheba hantle ka mahlong mme a rahela bolo pakeng tsa maoto a sebakadi seo. Babohi ba hoeletsa ke thabo.

Sebakadi se seng sa Diamond Football Club sa atamela ho Neo ho ya mo hlotha bolo. Ka potlako, Neo a fetsetsa bolo ho Priya.

Bohle ba hula moya ha Priya a nka bolo mme a e raha haholo. *LADUMA!* Sethibathibane sa Diamond ha se a ka sa bona letho! Priya o ne a hlabile ntlha.



Mme ka motsotswana feela. Eitse moo a reng o a fetoha ho keteka ntlha, moletsaphala a letsa phala ya ho qetela! Maqhawe a ne a hlotse papadi!

Neo o ne a thabile hoo a ileng a mathela ho Priya mme a mo phahamisetsa hodimo!



Mmoho ba mathela ho bomphato ba bona le mokwetlisi wa bona ka lehlakoreng la lebala, mme kaofela ha bona ba *deba*. Yaba Priya le Neo ba mathela ho ntata Neo. Rahul o ne a letsetsa vuvuzela hodimo.

"Tjhe, eo e bile papadi e loketseng aesekerimi, Priya le Neo," ha rialo ntata Neo. "Na bahale ba rona ba babedi ba tla thabela seo?"

"Ehlile! Re rata aesekerimi," Mbali a ba arabella. Bohle ba tsheha.

Neo a kuka Mbali mme a ya le yena ho ya reka aesekerimi. Leha a sa ka a hlaba dintlha tse pedi tseo a neng a di batla, feela o ne a thusitse motswalla wa hae wa hlooho ya kgomo ho hlaba ntlha ya tlhoho! Mme Priya? O ne a thabile hobane eo e ne e le ntlha ya hae ya pele ya Maqhawe. Modumo wa vuvuzela ya Rahul o ne o tshwana le mmimo o monate o neng o bapallwa yena feela.





## Etsa betjhe!

1. Seha hodima mola wa matheba a mafubedu bakeng sa ho ntsha betjhe.
2. Kenya mebala setshwantshong.
3. Seha sedikadikwe se boholo bo lekanang le betjhe sa khateboto e tshesane, ho etsa mohlala, lebokoso la sereale.
4. Sebedisa sekgomaretsi ho kgomaretsa betjhe eo hodima khateboto.
5. Sebedisa theipi e kgomarelang kapa *masking* theipi ho hokela sepelete bomoraong ba betjhe. Kapa o etse lesoba hodimo mme o kenye ulu kapa kgwele ho lona hore o tle o kgone ho e fanyeha molaleng wa hao.
6. Natefelwa ke ho apara betjhe ya hao ha o ntse o bala le ho mamela dipale ka Letsatsi la Lefatshe la ho Balla Hodimo.

Re romelle ditshwantsho tsa bana ba hao ka dibetjhe tsa bona tsa Letsatsi la Lefatshe la ho Balla Hodimo. Di romele ka imeile ho [info@nalibali.org](mailto:info@nalibali.org) kapa o abelane ka tsona leqepheng la rona la Facebook!

## Mabapi le Nal'ibali

Nal'ibali (lentswe la isiXhosa le bolelang "pale ke ena") ke letsholo la naha la ho-balla-hodimo. E ikemiseditse ho tsoelosa le ho tsetela moetlo wa ho bala Afrika Borwa ka bophara, e le hore ho bala, ho ngola le ho abelana dipale – ka dipuo tsohle tsa Afrika Borwa – e be karolo ya bophelo ba kamehla.



Bana ba potapotilweng ke dingolwa mme ba phela ka hara dipale tse monate ka dipuo tseo ba di utlwisang, ba na le thahasello ho feta, ba a itshepa mme ba tjantjella ho ithuta.

Hangata ba fetoha babadi, mme ba sebetse hantle sekolong dithutong tsohle. Dipale di aha tlotlontswe, di matlafatsa kgopolo ebile di fepa boinahanelo ba bana.

Haesale ho tloha ka 2012, Nal'ibali e sebeditse le balekane ba fapaneng ba mmusong, ba setjhabeng le ba dikgwebo ho etsa bonnete ba hore ngwana e mong le e mong wa Afrika Borwa o na le menyetla ya ho ba le lerato la dibuka le dipale. Balekane bao re theileng le bona ba kenyeletsa: DG Murry Trust, PRAESA (Project for the Study of Alternative Education in South Africa) le Tiso Blackstar (eo pele e neng e le, Times Media). Ka tshetso, thupello le disebediswa tsa boleng bo hodimo tsa ho bala, Nal'ibali e thusa ho matlafatsa setjhaba sa babadi.

Nal'ibali e mona ho tla o kgothatsa le ho o tshetso. **Ikopanye le rona** ka ho letsetsa setsi sa rona sa mehala ho **02 11 80 40 80**, kapa ka efe kapa efe ya ditsela tsena: